

Inatsisartut ilassutit aningaasaliissutitut inatsisissaannut siunnersuut 2023

(Aningaasaqarnermut Akileraartarnermullu Naalakkersuisoq)

Akissuteqaat

(Aningaasaqarnermut Akileraartarnermullu Naalakkersuisoq)

Aappassaaneerpeqarnera

Naalakkersuisut maanna Aningaasaqarnermut Akileraartarnermullu Ataatsimiititaliap 2023-mut Inatsisartut ilassutit aningaasaliissutitut inatsisissaannut siunnersuummut sukumiisumik isumaliutissiissuteqarnera qujassutigaa.

Aningaasaqarnermut Akileraartarnermullu Ataatsimiititaliaq isumaliutissiissummini 3-nik kaammattuuteqarpoq. Naalakkersuisut soorunami taakku malinniarpaat.

Ataatsimiititaliaq tigussaasumik 3-nik kaammattuuteqarpoq:

1. Ilassutit aningaasaliissuteqarnissamik qinnuteqaatit aningaasaliissutit nutaat allanngortitalluunniit ukiumi aningaasanut inatsiseqarfiusumi 1. januarimit 31. decembarimut iliuitsinut Nunatta Karsianut aningaasartuuteqarfiusunut taamaallaat tunngasinnaaneranik aningaasaliisarnermi tunngavimmuteqarfiisut eqquutsitsinerunissaat Naalakkersuisunit sulissutigineqassasoq. Naalakkersuisut tamanna isumaqatigaat, Naalakkersuisullu paatsoortoqannginnissaa pillugu erseqqissaatigissavaat, ukioq naatsorsuiffik tunngaviatigut ukioq naatsorsuiffiup kingorna naalerneranik taaneqartartumut ilaammat. Piffissap naalernerana naatsorsuuserinerit kingulliit naammassineqarnissaannut atorineqartarpoq, taamaasilluni Nunatta Karsianik naatsorsuutit sapinngisamik eqqortuutinniarlugit.
2. Ukiup aningaasanut inatsiseqarfiusup ingerlanerani aningaasaliissuteqarnissamik qinnuteqaatit nutaat allanngortitallu, ilaatigut ilassutit aningaasaliissuteqarnissamik qinnuteqaatit aningaasartuutitut naatsorsuutigineqarsinnaasimanngitsunut aammalu sillimmasiussanik atugassanngortitsineritut tunngasuunissaasa eqquutsinneqarneratigut, sapinngisamik ikilisinneqarnissaasa Naalakkersuisunit sulissutigineqarnerunissaa ataatsimiititaliamit ilanngullugu kaammattuutigineqarpoq. Naalakkersuisut tamanna anguniassavaat.
3. Ilassutit aningaasaliissuteqarnissamik qinnuteqaatit, tassungalu ilanngullugu minnerunngitsumik missingersuutitut ilanngussat oqaasertaliussallu ilaasut, pitsaassusiannik qulakkeerinnittarnerup nukittorsarnerunissaata Naalakkersuisunit sulissutigineqassasoq. Naalakkersuisut tamanna anguniassavaat.

Naalakkersuisut naggasiullugu inatsisissatut siunnersuummut isumaqatigiillutik tapersiineq qujassutigissavaat.